



Patric Collet cugl sies biro da consegliaziun ò la funcziun da dar las structuraz agl maletg directiv. Igl cuntign duess neir dalla populaziun.

Igls temas impurtants èn cumpiglias. Per part dattigl betg cunfegns clers tranter igls temas e glè pussebel tgi chels meidan er anc durant igl proceder. Oz discurrignsa perchegl digls sunadonts camps tematics: administraziun, turissem e taimp liber, infrastruttura e sier-tad, abitar e svilupp, economia, ambiant, furnaziun e cultura, socialesser e sanadad.

**Ena devisa digl maletg directiv è dad integrar la populaziun. Chegl n'è betg adegna simpel da mutivar chella persiva. Vez gio ideias scu tgi chegl pudess funcziunar?**

**Patric Collet:** Cunchegl tgi l'incumbensa per en tal plan directiv dereiva dalla populaziun e pretenda en'integraziun da tala, creia betg tgi dovra acziuns spezialas per la motivar da sa participar. Igl pi impurtant è d'infurmar avert e da mussar se, tgi chegl è ena pussebladad unica da participar agl proceder e d'influenzar la strategia digl cumegn pigls proxims, schagn 10 onns. Digl reminent èn betg angal anvidos igls indigens da sa participar agl proceder mabagn er persungas tgi on sagondas abitaziuns.

**Igls discurs cun chels schinumnos experts duessan esser directivs. Igls 31 d'otgover 2020 ò li en luvratori u workshop per la populaziun. Scu vasez igl decurs da chel?**

**Patric Collet:** L'antschatta digl sivamezde ni-rogl a dar en input general per tots. Chegl per tgi tot igls preschaints seian segl madem stand da saveida an chegl tgi pertotga igl proceder. Siva suondan divers workshops tematics, tigls quals la populaziun è dumandada da luvrar ve digl cuntign digl plan directiv.

**Igls resultats digl workshop duessan sarveir scu basa per en questunari online e la premaveira 2021 duess igl maletg directiv gio esser sen meisa. Ena fegnameira dètg sportiva?**

**Patric Collet:** Schi tot vo scu planiso sunga da bunga speranza tgi chegl ans gartegia.

## REGION

REGION ALVRA: strategia d'abitadi

### Svilupp receptors per la strategia d'abitadi

**comm./mc Igls 26 d'avost 2020 on igls represchentants digls 17 cumegns dalla regiun Alvra e Purtenza/Tavo infurmo sur digls proxims zaps digl model «strategia da spazis da veiver per seniors e per en rescumanzamaint dad otras persungas» scu er pertutgont questunaris per possessours da sagondas abitaziuns, indigens da passa 70 onns ed tots igls interessos. Maseiras per la realisaziun vignan coordinadas an treis luvratoris an collaboraziun da cres interessos.**

Igl project tgi vign sustignia dalla confederaziun, digl cantun, digls cumegns e digls partenaris ò la fegnameira da rinforzar las regiuns scu li d'abitadi. Cun ena creaziun cooperativa e participativa da spazis d'abitar e da veiver duess la generaziun 55+ neir sustigneida, la durada d'abitadi dalla generaziun 65+ neir prolungada e la scasada dalla generaziun 80+ neir pussibilitada.

#### Treis differents luvratoris

Cunchegl tgi las infurmaziuns planisadas dalla premaveira passada on betg savia neir manadas tras perveia dalla situaziun da corona, èn igls luvratoris nias drizzos pi ferm segls projects currentes e segls process aint igls cumegns. Ord chest muteiv on gia li differents discurs ainten cres pi pitschens. La populaziun vign er integrada aint igls luvratoris.

Tigl luvratori «stabileir abitadi da plessas generaziuns» vignan igls cumegns sustignias tar decisziuns d'investiziuns e la mobilisaziun dalla fiera. Sen basa dallas experientschas vignan sviluppos receptors per la realisaziun da projects d'abitadi per plessas generaziuns ainten regiuns muntagnardas.

Tigl luvratori «reiveir igls centers dallas vischnancas» vignan igls cumegns sustignias tar la formulaziun da visiuns communablas per redutgier igls bietgs veids scu er tar la mobilisaziun da coaliziun per la varietad d'adiever e per en pi grond domber d'abitants. Or dallas ancunaschientschas digls process vignan mess ansemen receptors per lascher reiveir participativ igls centers dallas vischnancas.

Tigl luvratori «commerzialisar la regiun d'abitadi» vignan colliias possessours da sagondas abitaziuns ed integros ainten la creaziun da spazis d'abitadi e da veiver. Tiers chegl vignan sviluppos projects da pilot per l'intermediaziun da stanzas d'abitar ed igl metter a disposiziun purscheidas d'affars pitschens e lavour a tgesa. Or digls projects da pilot neschans receptors per la commercialisaziun dalla regiun d'abitar Alvra e Purtenza/Tavo.

Scu part digls luvratoris vignan manos tras treis questunaris: siva dall'antschatta avost vign gio mano tras en questunari vast tigls possessours dallas sagondas abitaziuns. Chest'emda scumainza en questunari pigls indigens da passa 70 onns. Ultra da chegl son tots igls indigens e giasts interessos piglier part agl questunari online sot: [www.neustarter.info/wohnen](http://www.neustarter.info/wohnen).

#### Dus novs partenaris da finanzas

Las dus regiuns on savia gudagner dus novs partenaris da finanzas pigl project da model: igl uffezi per economia e turissem digl cantun Grieschun sa participescha ved la realisaziun digls luvratoris. La Fundaziun Age sustigna process, tgi veian ainten la midada demografica, ena schanza d'en svilup digls abitadis persistent. Ainten en ulterior pass vignan planisos igls luvratoris cugls cumegns. Ulteriouras infurmaziuns vignan a suandar pi spert tgi igls amprens luvratoris vignan ainten la fasa dalla realisaziun.



Igls participants alla dieta d'infurmaziun.